

Propietario Chobby Croes:

Antraco Aruba lo lanta atrobe manera un Phoenix for di shinishinan



ORANJESTAD—Lo reconstrui Antraco bek. Esaki ta un conviccion di su propietario Robert 'Chobby' Croes, kende a bisa cu ainda e no ta sigur si e realidad di e candela a dal e. Mientras cu riba e dia di e siniestro mes, e tabatin dominio di su emocionnan, e dia siguiente tabata un otro storia. Pasobra esey ta momento cu mester mira ki paso mester tuma pa por continua cu e negoshi. No solamente mester tene cuenta cu aspectonan di logistica despues di a perde inventario completo y tambe administracion, tambe mester traha cu seguro, cu departamentonan tecnico di Gobierno, tur mientras cu e negoshi di benta lo mester sigui. Esaki

ademas cu tin un responsabilidad cu trahadonan. Croes ta anima si pa e sosten cu el a ricibi di un cantidad di hende. Te hasta a ofrec'e luga y computer pa ubica e administracion di Antraco, te ora cu reconstrui. Y ta manera un amigo comerciante a corda con Chobby Croes mes tabata anima otro. E dicho di Croes tabata 'you can't keep a good man down,' esta no por tene un bon hende abou. Y awor, su amigonan ta ripiti e mesun dicho pa e propietario di Antraco. Esey no ta kita afo si, cu ta momentonan di emocion hopi grandi. E no tabata facil pa contene lagrima ora di pensa e trahadonan di 48 aña cu awor ta na shinishi. Sinembargo,

e apoyo di amigo y conocinan y tambe coleganan empresario ta duna hopi inspiracion pa haya e energia necesario y lanta cabes un biaha mas.

Chobby Croes ta hopi orguyoso di su yiu homber cu a tuma rienda di Antraco 5 aña pasa y tambe di tur e trahadonan cu a demostra un lealtad y compromiso pa hunto bay dilanti. Segun e propietario, Robert su yiu, no a drumi casi nada henter anochi, mas bien pa por a organiza con pa sigui dilanti. "El a bin cu plan. E tabata hopi efectivo." Y su tata ta cla pa brind'e tur e apoyo y experiencia necesario. "A lo mejor, nos lo sali manera un Phoenix." Pa Director di Antraco Robert Croes III, tampoco ta facil pa pone emocionnan unda banda. Pero trabou mester sigui. "Nos ta un compania dinamico." Y mirando e filosofia cu pa un negoshi keda fuerte, mester tin cambio semper, lo mester aplica e mesun pensamiento den un situacion inespera. "Esaki ta un otro cambio cu nos mester anda cu n'e. Nos no tin escohenencia, nos mester pu-



Chobby Croes ta hopi orguyoso di su yiu homber cu a tuma rienda di Antraco 5 aña pasa y tambe di tur e trahadonan cu a demostra un lealtad y compromiso pa hunto bay dilanti.

sha bay dilanti." Na e momentonan tin un plan a corto plazo con pa sigui dilanti y tambe uno pa e periodo pa sigui. "E plan pa termino largo ta den proceso ainda." Sinembargo, hecho ta keda cu e candela y e destruccion enorme no ta algo cu por absorba asina lihe, y ainda tur hende ta den e fase ey, pa berdad realisa kico a pasa y ki efecto di e susedo aki lo por ta. "Ta despues nos lo haya sa kico mas nos a perde." En todo caso, Croes ta contento di tin un team cu generalmente ta

bin cu bon idea y "nos ta contando riba dje."

Scolnan
Un di e clientenan grandi di Antraco ta enseñansa. Diferente scol ta bestel nan material via Antraco. Y Chobby Croes a bisa cu e compania lo sigui brinda e servicio aki y ta un aspecto di negoshi cu por pone den operacion relativamente lihe y facil. Ta cuestion di manda pedido pa e scolnan. "Nos tin nos contactonan internacional cu facilmente ta pone cu por bestel e materialnan," Chobby Croes a bisa. □

Trahadonan cla pa lanta Antraco riba pia atrobe

ORANJESTAD—Benito Gomez y Juan Krozendijk tin responsabilidad grandi pa yuda Antraco lanta bek riba pia, y nan trabou a cuminsa ayera caba. Gomez ta encarga cu e departamentu di servicio, y tanto su team y e mes tabata cla pa atende cu clientenan ayera mes. "Servicio ta bay sigui. Asina cu hendenan yama, nos lo atende cu nan." Gomez ta papia aki di clientenan cu ta lease machinan di copia y otro for di Antraco. Un problema cu e team mester lucha cu n'e den e dianan venidero ta e falta di pieza. Tur e piezanan cu tabata den deposito a kima, pues si mester cambia parti, esaki lo dura algun tempo. "Nos lo purba yuda clientenan si nan machinan cay afo, pa purba lanta nan. Y tambe si e ta urgente, nos lo mira si nos por saca pieza di nos ma-

chinenan 'second hand' cu por tey ainda na Antraco, pa asina yuda e clientenan mas tanto cu por, bou e circunstancianan cu tin actualmente." Segun Benito Gomez, e team di servicio como tal lo ta cla pa sigui trabou. Juan Krozendijk a bisa cu e pregunta cu mas el a haya ta 'kico a pasa den su mente' ora cu el a tende cu tin candela. "Nada a pasa den mi mente e ora ey." Krozendijk ahaya yamada di coleganan pa controla kico tabata e zonido straño cu tabata sinti riba e dak di oficinanan." Ora cu el a bay patras den e deposito, e tabata pa medio di e 'skylight' cu tabatin luznan strañonan tabata cay riba dak y e dak tabata tembla. "E momento ey mi a bisa tur hende pa bay pafo." Despues el a bay e oficinanan pa avisa cu tin candela. E mes a bolbe e de-

posito pa mira si tur hende a sali y tabatin algun hende den e parti mas atras di e deposito ainda cu tabata un oficina di aircu pa warda e tonernan. "Ainda nan tabata kier a coi nan celular, tas, pero mi a bisa nan pa sali mesora y laga tur cos atras." Despues di a controla cu tur hende berdad tabata afo, tur e bay para mas leu y a mira cu den cuestion di algun minuut, henter e edificio unda nan tabata traha tabata manera fierno. Y pa Krozendijk, e candela a stroba hopi di su trabou. E momentonan ey el a caba di organiza henter e deposito pa por a haci un inventario. "M'a prepara henter e luga, mi tabata contento cu mi tabata cla cu mi trabou cu anticipacion y pa mira despues con den algun seconde, poeff, tur cos a bay." Y e deposito tabata yen



Benito Gomez y Juan Krozendijk tin responsabilidad grandi pa yuda Antraco lanta bek riba pia, y nan trabou a cuminsa ayera caba.

di material, incluso mueblenan di oficina nobo pa Valero marketing, incluso machinenan di copia grandi, cuater container di caha di papel. Tambe tabatin tur e productonan automotriz cu a caba di yega. "Pa mi e cos aki ta un golpi duro mirando tur e trabou cu nos a hinca aden. Gran parti di nos entrada a caba di yega. Cos tabata bayendo bon, y e

golpi aki ta duro." Krozendijk ta kere si cu awor ta un bon momento pa cuminsa reconstrui e negoshi, basa riba experiancia cu a haya no solamente cu e incendio, pero tambe den reorganizacion di henter e operacion. "Nos por start den un bon forma y Antraco lo ta 'back on track' den bon forma," tabata e comentario di Juan Krozendijk. □